

西

夏

書

事

西夏書事卷十八

青浦 吳廣成西齋 纂

慶歷五年契丹重熙十四年 夏天授禮法延祚八年春正月

貢鵠于契丹

契丹自西征敗衄山前後困敝殆甚又女真渤海所在擾亂曩霄知其衰常以兵掠其境契丹主怒欲起傾國兵討之曩霄因以白鵠貢

二月復互市

天聖中陝西榷場二及曩霄稱帝互市絕保安軍

榷場遂廢陝西並邊主兵官猶與屬羌交易後并

禁之曩霄數使請復乃復置場于保安軍及鎮戎

軍之安平砦

夏四月使賀乾元節

使人爲素齋哔布移則張文顯

五月歸石元孫

元孫與劉平被執傳言已死仁宗贈平朔方軍節

度兼侍中謚壯武

王氏東都事畧平被執不食數罵夏人曰我頸長三尺何不速

殺我縛我何之乎遂見殺年六十三宋史平傳平執後降羌多言平在興州生子數年才死及元孫

歸乃知其實
二書互異

元孫亦贈中正軍節度兼太傅錄其

子孫七人是時曩霄因納欵縱之還諫官御史奏
元孫被執不死爲辱國請斬塞下以示西人賈昌
朝獨引春秋穀臣知營故事請赦之乃安置全州
閏五月使謝封冊

曩霄遣丁盧嵬名聿營呂則張延壽賚表入謝冊
命又遣蕃僧吉外吉法正等謝景祐中所賜佛經
附
李氏長編五年閏五月丙戌朔賜通判鎮戎
軍雷周式五品服先是夏人圍鎮戎周式收散

卒二萬人入保夏人引去故賞之按是時曩霄臣服何以有圍鎮戎事宋史不載

六月貢于契丹

曩霄雖臣中國猶倚契丹爲援聞其君臣謀議通報丁口簡募甲兵日夜教閱思雪前恥懼其報復故貢獻倍勤

秋七月寇築城

白豹砦官浪尾等一百八十餘人其族帳傍近環慶遣使至經畧司請內附曩霄謂中國招之以

兵三千入秦州侵築城掠人畜而還

按此西夏既臣復叛之始書寇嚴君臣之辨也

八月保安軍移文來詰地界不聽

初曩霄獻榜柂鎌刀諸砦繼言九州十三縣向屬

故土乞賜還

陳師道後山談叢作求割三州十六縣此據余靖奏狀州縣之名史不詳

載中國不許及進誓表仁宗詔延州保安軍別定

封界其餘皆如舊境曩霄不肯如約鄜延經畧司以聞詔保安軍移文宥州令遵守誓約指揮曩霄

遷延不奉詔

出遇乞妻沒藏氏爲尼

曩霄殺旺榮遇乞久之野利后訴旺榮兄弟無罪
曩霄悔之令求遺口得沒藏氏于三香家迎養宮
中已與之私野利后覺之不忍殺使出爲尼號沒
藏大師居于興州戒壇寺

按爲尼何書誌亂成也曩霄之弑雖成于奪子
婦實始于私沒藏蓋沒藏爲尼野利氏實出之
及生子諒祚野利氏母子不能安矣故訛龐之
捕逆致寧令之肆凶悉由于此書以爲肆淫者

戒

冬十月行崇天萬年歷

德明時行中國儀天興注歷垂三十年乾興初真宗命司天張奎運等議改歷其法以八千爲日法一千九百五十八爲斗分四千二百九十九爲朔距乾興元年壬戌歲三千九百萬六千六百五十八爲積年至天聖元年八月歷成率以一萬五百九十爲樞法得九鉅萬數命曰崇天萬年歷未及頒而曩霄稱帝自爲歷日行于國中至是始奉仁

宗頒賜行之

十一月駐兵葫蘆河

曩霄凡入塞先遣人放牧牛羊與蕃戶漢人相習久之然後縱兵肆掠故緣邊莫之爲備是時令二萬騎立砦新築邊濠外及葫蘆河諸川或五里或七里邊臣以仁宗詔諭勿得侵擾西界不敢驅逐由是兵屯日衆

子阿理謀逆殺之及妃咩米氏

咩米氏曩霄第四娶生子阿理無寵屏居夏州王

庭鎮阿理年漸長謀聚衆爲亂其黨臥香乞以告

曩霄執阿理沉于河遣人賜畔米氏死

按王莽盜漢子臨弄兵石虎弑君遂宣謀逆從

古篡亂之奸必生逆子雖戾氣所鍾亦天道禍淫之理也曩霄弑母叛君生子不教故分愛憎釀成逆亂豈盡畔米氏罪哉

十二月侵屈野河執麟州指使魏智

麟府二州山川迴環五六百里悉蕃漢種植所自曩霄侵掠尙餘三千餘戶散處黃河東岸自來所

修堡砦僅通麟府道路夏兵知其別無城守輒放人馬過界直逼屈野河東智引兵追逐夏兵執之已聞知州領衆來救遂出銀川砦而回

遣楊守素至保安軍索在漢人戶

曩霄初上誓表言所掠蕃漢人戶兩不相還至是遣守素自陳事宜理索在漢人戶仁宗詔保安軍引伴至延州示以元進誓表諭之既而又索所降黃族軍主黃移都等四十九人移都畏誅與其族人各勒兵願死漢境鄜延經畧司言移都等來投

在朝廷未降約束前恐不宜遣去以快夏人之忿從之

慶歷六年

契丹重熙十五年

夏天授禮法延祚九年春正月

遣使獻地復索過界人戶

晏霄遣楊守素持表及地圖入獻臥貴龐吳移已布等城砦九處并理索過界人四百餘戶而所獻並屬漢地但以蕃語亂之所云內投邊戶亦在漢界不當還者仁宗降詔諭令增設誓條自今有過界者雖舊係邊戶亦不得容納其緣邊封界只以

誓詔所載爲定

夏四月復請邊臣毋納過界蕃戶

夏國作過蕃官浪瞎等七百六十二人爲環慶經
畧司招誘內降曩霄上表請禁且乞附入誓詔仁
宗從之

作避暑宮

夏俗皆土屋或織釐牛尾及黏麅毛爲蓋惟有命
者得以瓦覆故國中鮮游觀所曩霄于城內作避
暑宮逶迤數里亭榭臺池並極其勝

五月築後橋諸堡

後橋蕉蒿砦及十二盤諸堡向爲中國所破曩霄
令屬下蕃戶累至其地開築舊堡環慶路以聞

冬十月獻豐州地請定封界

初曩霄欲以沒寧浪等處爲界仁宗下河東經畧
使鄭畋議之畋言沒寧浪諸處並在豐州南深入
府州之腹若從其言則麟府二州勢難以守宜以
橫陽河爲界議彌年不決曩霄復遣楊守素納豐
州故地上言先以兵馬收獲承平分水向西一帶

疆土已分賞得功將校今邊臣數有所爭未協累
年之譏仁宗以戢所上地圖命刑部員外郎張子
奭至保安軍與守素面議會子奭病改命國子博
士高良夫同東路巡檢馬懷德管經畧機宜文字
楚建中往蒞其事議未定兵暴集騎皆傅矢引滿
相向建中披腹當之毫無懼色衆服其量議稍有
緒建中請築安塞黑水等八堡以控東道曩霄遣
兵爭之聞有備不入

慶歷七年契丹重熙十六年夏天授禮法延祚十年春二月

獵于兩岔河生子諒祚

曩霄常顧沒藏尼于戒壇院臣下諫之不聽是時

出獵載沒藏氏偕行營于兩岔河而生諒祚

王氏東都

事畧李氏長編俱以諒祚爲遺腹生

宋史夏國傳諒祚小字寧令哥

王氏東都事畧李氏長編並以爲其兄名觀宋史於小字寧令哥下既解其義復云兩岔河名沒藏

氏從元昊至此生諒祚遂名焉是諒祚本名寧令

沈括筆談云寧令華言大王也亦與史異

兩岔謂至兩岔河而

生時月之六日也曩霄令養于沒藏訛龐家訛龐

以漢人毛惟昌高懷正向屬遇乞帳下使二人妻

更乳之訛寵沒藏尼兄也

按綱目書子生五皆有關治亂之故者此書諒

祚醜夏也曩霄身爲梟獍生子非天死卽逆誅
至以奸生之子繼承國統非譜牒羞乎羅氏夏
國世系不詳其事茲取李氏長編及王氏事畧
補之

二月起高臺寺

曩霄五月五日生國中以是日相慶賀舊俗止重
冬至曩霄更以四孟朔爲聖節令官民禮佛爲已

祈福至是于興慶府東一十五里役民夫建高臺
寺及諸浮圖俱高數十丈貯中國所賜大藏經廣
延回鶻僧居之演繹經文易爲蕃字

三月以沒藏訛龐爲國相

於是沒藏氏與訛龐日夜謀危寧令哥爲立諒祚
計

夏四月通銀星和市

初楊守素等畫界既以橫陽河爲定議而于麟州
居野河西地則云吾馬足所踐卽爲吾土不肯明

立界至仁宗命知麟州張繼勲勘之繼勲言夏人
日逼屈野河耕墾畜牧興置砦柵若卽以河西爲
禁地實與城相距非便若用咸平五年以前界至
則太遠難守當以大中祥符中所定爲則遣臨塞
堡監押馬寧指使殿侍康均詣宥州與監軍司言
之曩霄令把關太尉曹勉管勾和市曹勍謂均等
曰中國若肯通銀星和市則河西疆界一切如約
經畧司令入保安軍自陳勉等至軍朝議以疆界
既肯如舊許之

五月奪子婦沒嚙氏立爲后

曩霄先七娶

宋史夏國傳作五娶
茲從李氏長編下同

一衛慕氏二索

氏

傳以索氏
氏爲第五

三都羅氏早死四畔米氏五野利氏

傳以野利
氏居第三

生三子長寧明次寧令哥次薛哩早死

六耶律氏

傳以耶律
氏爲第一

契丹公主也七沒嚙氏卽營

天都山居者至是爲太子寧令哥娶婦沒嚙氏見

其美而自納焉號爲新皇后

張溥曰曩霄雄毅

多畧志成叛逆衛慕氏其母也而弑之山遇其叔

也而殺之及爲子娶婦而美則自納焉衛宣高洋

兩鍾其惡天命不佑宜其死不旋踵也

按

自古亂倫之主若衛宣楚平及唐元宗梁朱溫皆國亂身危貽譏千古曩霄自中國講和契丹戰勝志得意滿日卽慆淫荒佚之事史不勝書至奪寧令哥婦立以爲后其滅絕天倫尤非人類蓋不如是則罪不極貫不盈不足殞其身弱其嗣也續綱目列其事于外注茲特書之以著其惡

六月廢后野利氏

野利氏遇乞從女也

司馬光日記載麗籍語元昊妻卽旺榮妹與宋史夏國傳

異身頑長有智謀常帶金起雲冠令他人無得冠

者封憲誠皇后曩霄素畏之自納沒哆氏別居天

都山后稀得見旺榮遇乞之死后已不平及奪子

婦沒哆氏益失寵出怨望語曩霄聞之黜居別宮

不復相見

按

綱目廢后例有二書后某氏廢有罪辭也廢

后某氏無罪辭也曩霄凶逆母且弑之何愛于

野利氏故雖以怨望廢仍以無罪書

秋七月築離宮于賀蘭山

賀蘭陽屏西夏陰阻北蕃延亘五百餘里樹木青
白望如駿馬北人呼駿爲賀蘭故名曩霄自奪沒
噶氏廢野利后陰聞寃令哥有怨言大役丁夫數
萬於山之東營離宮數十里臺閣高十餘丈日與
諸妃游宴其中悉以國事委之訛龐

九月徙榷場于順寧砦

曩霄因保安榷場僻陋羊馬無放牧地請徙順寧
然蕃商卒不至

冬十一月遣使請歲賜

舊中國歲賜盡明年六月乃畢曩霄以爲緩使宥
州監軍司牒保安軍請以歲終爲限延州以聞樞
密院牒草報如約時延帥闕主管經畧司文字李
師中更其草曰當如故事曩霄氣憚不復請

慶歷八年契丹重熙十七年夏天授禮法延祚十一年春正

月朔日赤無光

元旦行朝賀儀羣臣相顧失色

國主曩霄爲子寧令哥所弑

初曩霄殺野利兄弟其族皆失職怨望及寧令哥失妻野利后被黜母子日夜慮禍及沒藏訛寵知其意陰勸寧令哥作亂寧令哥信之與野利族人浪烈等於月之望日乘曩霄醉入宮刺之不殊救者至浪烈等鬪死寧令哥劓曩霄鼻而出追者急走免沈括筆談元昊後房先生一子曰寧令受後又納沒藏訛寵之妹生諒祚而愛之寧令受之母恚忌欲除沒藏氏授戈寧令受圖之寧令受間入元昊室猝與元昊遇刺之不殊而走諸太佐沒藏訛寵輩仆寧令受明日曩霄死中僅云元昊

爲其下所殺遣楊守素來告哀不言其子戕之也仁宗紀及夏國傳不載遼史亦闕之茲酌取王氏

東都事畧李氏長編兩書年四十六僭號十七年改元五謚曰

武烈皇帝廟號景宗墓號泰陵王偁曰自德明

欵塞西鄙息肩矣元昊強梁凶悍乃謀僭尊以天下之力臨區區一方然未嘗少挫及敗于女色禍發其子彼能叛君而子亦能弑父此天道也

按臣弑君子弑父天下之大逆也書法必曰某弑其君某某弑其父某正弑者之罪足矣茲曷以爲子所弑書書爲所弑則弑者有可誅之罪被弑者亦有難逃之責蓋曩霄弑母奪媳滅理

亂倫罪大惡極豈尋常書法可例故以綱目梁
朱溫燕劉仁恭例書至竇令哥之罪則書子書
弑早正之矣

論曰曩霄智足以創物先才足以馭羣策衣冠
禮樂之變官法文字之奇更祖宗成規貌中朝
建制人言可恤彼惡知之而其用兵則嚴賞罰
集衆長攻少堅城戰無猝敗倘生亂世劉元海
石世龍當其亞也迹其英雄自喜霸王由吾妄
膺寶篋顯盜鴻名肆兵力以脇諸蕃逞狡謀而

欺中國羌戎殘獮斯爲甚乎然而政尚刑誅性耽淫泆戮叛戚則弑其母逞逆謀則殺其叔貪好色則辱其臣之妻奪其子之婦三綱淪矣國何以立況又窮奢極欲勞役無時衆怨方興子禍旋作張氏謂中國未揚郭李之威狂夫自蹈安史之慘旨哉言乎

國人討寧令哥誅之沒藏訛龐立諒祚尊沒藏氏爲太后

初沒藏訛龐欲以諒祚主夏國誘寧令哥弑逆因

以爲罪及寧令哥刺曩霄不死逃匿黃蘆黃蘆訛
龐所居也訛龐遣人執殺之并其母野利氏曩霄
遺命立從弟委哥寧令大會諾移賞都埋移香熟
嵬名浪布野乜浪羅等與訛龐議衆欲如遺言訛
龐曰委哥寧令非子且無功安得有國諾移賞都
曰國今無主然則何所立不然爾欲之乎爾能保
守夏土則亦衆所願也訛龐曰予何敢哉夏自祖
考以來父死子及國人乃服今沒藏后有子乃先
王嫡嗣立以爲主誰敢不服衆曰諾遂奉諒祚立

之尊沒藏氏爲宣穆惠文皇太后訛龐以諾移賞
都等三大將典兵久令分掌國事已爲國相總攬
政柄沒藏本大族訛龐爲之長至是權益重出入
儀衛擬於王者

按于是訛龐殺寧令哥而書國人討何不子訛

龐以討賊之義也蓋寧令之逆訛龐實構成之
其殺寧令亦爲諒祚地耳豈真知大義哉故寧
令哥書國人討以見弑父之賊人人得誅萬世
之公也諒祚書訛龐立以見違命專擅利立幼

君一人之私也

二月遣楊守素告哀

訛龐旣立諒祚遣守素至京師告哀守素多智數嘗勸曩霄不稱臣納使節者押伴陝西轉運使任頴試問國主所以死守素不能對訛還不敢肆仁宗遣開封府判官尙書員外郎曹頴爲祭奠使六宅使達州刺史鄧保信爲弔慰使賜絹一千疋布五百端羊百口米麵各百石酒百瓶及葬仍賜絹一千五百疋餘如初賄

獻遺于契丹

初曩霄卒使人至契丹告哀契丹主遣永興宮使耶律彊里右護衛太保耶律興老將作少監王全慰奠至是訛龐以曩霄遺物獻

三月鐵不得國請契丹會師來攻契丹不應

鐵不得在伊吾西素不通契丹曩霄據瓜沙嘗以兵掠其境國主畏之不敢禦是時聞曩霄死遣間使由敦煌山谷間至契丹獻玷玉馬駢等物請以本部兵攻夏國乞以師援契丹主謂其道里遠遠

聲應不及謝之

夏四月諒祚受冊爲夏國主

中國議者因諒祚幼弱母族專權請以節鉞啖其
諸將使各有所部分以弱其勢可不戰屈也陝西
安撫使程琳曰幸人之喪非所以柔遠人不如因
而撫之或請乘喪舉兵知慶州孫汚亦言伐喪非
中國體史云議者惜其失幾仁宗乃遣尚書刑部員外郎任
顥充冊禮使供備庫副使宋守約充副使冊諒祚
爲夏國主初曩霄受封朝廷頒以印綬至是但有

封冊不更賜印後遂爲例

附朱史程琳傳夏人圍慶陽會朝廷行諒祚冊禮琳止詔使于鄜延曰夏人貪此可紓慶陽之難乃具禮幣賜予之數移報之夏人果喜卽日迎冊使而圍解攷歐陽修作琳墓銘及神道碑不載此事琳傳不知何據

五月索叛酋孟香于慶州

孟香宥州蕃酋得罪懼誅率衆千餘內附訛龐遣兵以求香爲名刦邊戶掠牛馬仁宗詔知州杜杞

還之杞言夏人違約舉兵香不可與因移檄言不償所掠則香不可得訛龐不肯償所掠杞亦卒不遣香

六月謀攻延州兵及境而還

延州東北阻山無城郭蕃騎易于出入知州程琳嘗獲夏國戎首不殺戒遣之夏人亦聲言毋捕漢人久之以五百戶驅牛羊扣邊云契丹兵至衙頭國中大亂願自歸琳曰此詐也契丹兵至當舉國取之豈容來降聞夏人方捕叛者此其是耶不然

直誘我耳拒不受已而果有三萬騎臨境上以捕
叛者爲辭琳戒諸將勿動閉壁偃旗以待夏兵知
有備引還

秋九月遣使入謝祭奠

曩霄稱臣後數犯約抄邊邊吏避生事不以聞于
是諒祚謝祭奠使入延州頗僂蹇自大經畧司遣
引伴送闕不敢慢

冬十二月使謝封冊

獻馬驅各五十匹宴于朵殿賜物遣還 史臣曰

趙德明在祥符間已追帝父于國中逮元昊始顯稱帝諒祚因之雖受封冊于宋宋亦稱有歲幣之賜誓詔之答要皆出于一時之言其心終未嘗有臣順之實也

西夏書事卷十八終

西夏書事卷十九

青浦 吳廣成西齋 纂

皇祐元年

契丹重熙十八年

夏延嗣寧國元年春正月朔日

有食之

羣臣以幼主改元元旦日食天象可畏請慎政刑

訛龐不聽

二月契丹留賀正使

曩霄臨終遺言曰異日力弱勢衰宜附中國不可
專從契丹蓋契丹殘虐中國仁慈順中國則子孫

安寧又得歲賜官爵若爲契丹所脇則吾國危矣
是時契丹以南壁舊怨不肯行封冊及遣使賀正
遲期遂羈使者會集諸道兵遣北院樞密副使蕭
惟信以伐夏告中國

夏六月復遣使如契丹貢

沒藏氏以前使未還聞契丹將興兵再遣使貢以
覬動靜契丹主復留之

秋七月月犯歲星

在東井十二度

契丹兵來侵破唐隆鎮

契丹主下詔親征以天齊王重元北院大王耶律仁先爲前鋒韓國王蕭惠爲河南道行軍都統趙王蕭孝友漢王貼不副之率兵渡河至唐隆鎮破之邊吏皆遁走

按聲罪致討曰伐潛師入境曰侵遼主下詔親征聲討有罪故續綱目大書曰伐然兵以義動始稱王師今契丹以賀正遲期復修舊怨凌人之孤乘人之喪豈爲義舉書侵惡其無名也

九月襲契丹將蕭惠兵敗之

惠兵入境戰艦糧艘綿亘數百里偵候不絕鎧甲悉載車上軍士不得乘馬諸將請備不虞惠曰諒祚必自迎車駕何暇及我無故設備徒自弊耳數日不立營柵訛龐知其不備遣兵從高坂突下擊

之惠與麾下不及甲而走追者叢射幾不得脫士

卒死傷萬計仁宗御集云諒祚爲國主與契丹戰

身先士卒親犯矢石故能取勝攻諒祚時僅兩

歲前說誤

按兵騎者敗蕭惠之兵可謂驕矣驕以致敗主

將之咎書名斥之

冬十月復戰于賀蘭山敗績國主母沒彥氏被執

契丹主遣北道行軍都統耶律敵魯古率阻卜諸

部軍由北路趨涼州至賀蘭山訛龐以三千騎扼

險拒戰殺烏古敵烈部詳穩蕭慈氏奴南剋耶律

幹里等敵魯古大呼奮擊夏兵敗潰諒祚母沒彥

氏及官僚家屬皆被執以去

李氏長編契丹使殷前副檢點耶律益彭

德節度趙東之告宋言三路兵伐夏契丹主出中

路大捷北路兵至西涼府獲羊百萬駝二十萬牛

五百俘老幼甚衆惟南路小失利而宋之邊奏皆

以爲遼主濟河不遇敵無水草馬多死耶律貫寧

大敗于獅子口惟劉五常獲陝西所陷
屬戶羌二十餘人而已與遼史諸傳異

皇祐二年契丹重熙十九年夏天祐垂聖元年春正月使獻

契丹捷

以上年勝契丹捷入獻使至保安軍知軍以誓詔
無汎遣人例拒不納

二月侵契丹圍金肅城敗績

沒藏氏以賀蘭之敗不復貢獻契丹遣使詰責沒
藏氏使大將洼普猥貨乙靈紀率兵圍金肅城契
丹南面林牙耶律高家奴西南面招討使耶律僕

里篤迎擊大敗之猥貨乙靈紀等死洼普中創走
還

三月戰于三角川復敗

沒藏氏復遣觀察使訛都哆督兵屯河南三角川
窺契丹威塞堡契丹都檢點蕭迭里得率輕兵襲
之斬候者八人諸將不及備迎戰大敗都哆被擒
失輜重器械無數

夏五月契丹兵圍興慶府大掠

契丹主命西南面招討使蕭蒲奴北院大王耶律

宜新林牙蕭撒末率師伐夏以行宮都部署別古
監戰北院同知樞密使蕭革按軍邊城爲聲援蒲
奴等入境圍興州四面縱兵大掠沒藏氏不敢戰
令諸城堅壁拒之

將軍洼普降于契丹

初注普兵敗訛龐欲誅之沒藏氏使練兵賀蘭山
以責後效及契丹兵深入懼誅率所部降

六月契丹破攤糧城

城在賀蘭山西北國中儲糧處契丹兵攻破之盡

發廩積而還

仁宗實錄契丹獲渭州張家堡指揮使張遂來歸遂于慶歷中與州民范

仁美持知州王沿書入夏間野利兄弟事泄仁美被殺安置

遂于灤糧城至是契丹得之遣還朝廷

錄爲三班奉職

秋九月侵契丹又敗

夏兵侵契丹邊境耶律敵魯古遣六院軍將海里等擊之敗還

按

夏國主少國疑戰而倖勝卽當服罪請和息

民保境以圖自全計不出此致國母被擄城邑瀕危亦爲不善變矣乃猶收合燼餘狡焉思逞

直自困而已于契丹乎何損兩書侵書敗譏其不知量也

冬十月使如契丹通好

沒藏氏數不得志于契丹使請依舊稱藩契丹主不允使還諭別遣信臣至當徐思之

十二月奉表乞臣于契丹不答

沒藏氏復爲諒祚表請和言遵母訓乞依舊臣屬契丹主不答

皇祐三年契丹重熙二十年夏天祐垂聖二年春三月契丹

來索党項降戶

裏胥時納党項降戶數千河曲之役請率諸部待罪後因戰勝不遣至是契丹遣北院都監蕭友括來索沒藏氏不與

夏四月契丹使還表請代党項進獻

沒藏氏旣留降戶不遣蕭友括還恐契丹詰責奉表乞代党項權獻馬駝牛羊等物契丹主許之五月求唐隆鎮故地于契丹不得

唐隆藩屏夏州爲東北重鎮自經契丹殘破族帳

逃亡契丹以地介河西不置戍守沒藏氏思經復其地遣使請之契丹主不許

六月契丹置沒暠氏于薊州

沒藏氏常遣人撫諭党項諸部國中點集人馬訓練無虛日契丹主聞之命于西南沿邊各建城邑爲備沒藏氏屢請罷役契丹主知其心叵測以所獲物遣使入獻

按是時兩國交兵殊無義戰然夏旣稱臣表獻

方物自當歸其虜獲以全母子之親乃仍安置
遼州死生惟吾雖夏國君臣不能以誠信格人
而契丹處之爲已甚矣

皇祐四年契丹重熙二十二年夏天祐垂聖三年夏五月阻卜

酋長兀里得遣使請附不納

阻卜久臣契丹其王屯禿古斯及酋長豁得刺喘
只葛拔里思常以馬驅瓊玉貢獻兀里得與豁得
刺弟幹得構隙慮其侵掠遣使至夏國請附沒藏
氏懼契丹兵威不敢受

秋九月請契丹弛邊備

契丹以諒祚幼弱強臣用事常置重兵諸邊戒飭
封堠沒藏氏遣近臣吃多已貢物契丹乞弛守備
契丹主使蕭友括慰諭之

皇祐五年

契丹重熙二十二年

夏福聖承道元年春二月移牒

索古渭州地

古渭西蕃界距秦州三百里道經啞兒峽宥州兵
卒牧牛羊其地常爲青唐酋蘭擅掠取監軍司怒
將攻之蘭擅懼不敢籍土入獻冀得兵戍以禦夏

兵知秦州范祥欲立奇功亟往城之又括熟戶田

蕃部驚擾相率叛詔龐欲得其地久移文中國言

古渭本我地朝廷置州于彼有違誓詔仁宗詔戶

部副使傅永按視永招諭羌衆反其田

宋史梁適傳古渭初

建砦間爲屬羌所抄益兵拒守羌衆驚疑時適以觀文殿大學士知秦州具牛酒召諭其種人且罷

所益兵羌遂不爲患與傅永傳異報宥州以渭非素有不應索正

其封界乃不復言

傅永正封界李氏長編在七月茲聊及之

三月使如契丹謝

以契丹賜詔許降也

夏四月侵靜邊砦

訛龐索古渭不得縱兵入德順軍圍靜邊聞端明
殿學士王素來知渭州涇原蕃夷士庶數萬皆歡
迎遂還

五月寇環慶

經畧司以聞仁宗詔邊吏嚴備毋得輒有侵軼

按前侵靜邊茲寇環慶方與北和復開東釁書

以甚其不靖也

九月進降表于契丹

表不如式契丹主使南面林牙高家奴持詔諭意
至和元年契丹重熙二十三年夏福聖承道二年春正月遣使
契丹貢方物

契丹主以諒祚降非誠心諭使者曰爾主若念國
威不忘姻好當心懷恭順不在貢獻勤怠間也卻
其物不受

夏五月奉表契丹請進馬駕

契丹主許令歲貢無缺沒藏氏尋遣使獻

六月侵古渭砦

夏兵數至古渭剽掠人畜秦鳳經畧司請于鄰路
益兵五千爲備

秋七月請婚于契丹

契丹主以沒藏氏反覆不許

冬十月進誓表于契丹

沒藏氏遣使上誓表並請誓詔契丹主賜以車服
而不許誓詔

至和二年契丹重熙二十四年夏福聖承道三年春二月使賀
契丹尊號

契丹主上太后尊號已受羣臣尊號大赦國中沒藏氏遣使賀

綏州蕃族阿訛等內投

仁宗以諒祚幼弱不欲生邊事詔約還之

三月沒藏訛龐侵耕屈野河西地

麟州西北枕睥睨曰虹橋下瞰屈野河其河以西距夏境尙七十里並無堡障斥堠天聖初州官相與訟河西職田久不決轉運使奏爲禁地官民並不得耕植于是民有竊耕者夏人輒奪其牛曰汝

州官尙不敢耕汝何爲至此由是河西遂爲閒田

夏人始于洪崖塢道光谷間插木爲小砦三十餘所盜種砦旁田元昊時已侵十餘里諒祚立中外

事悉訛龐主之知河西田膏腴厚利

李氏長編云其田外則蹊徑

徑險狹柏木叢生漢兵難入內則平壤肥沃宜種粟麥故夏人必欲爭之

令民播種以

所收入其家歲東侵不已距河僅二十里宴然以

爲已田游騎直至城下或過城東往來自若

按侵耕細民事耳直書訛龐斥主者也訛龐爲

國大臣至令小民爭數十里之田以爲已利貪

鄙甚矣

夏四月遣使入貢賜大藏經

沒藏氏因阿訛等還感中國恩遣使入貢仁宗賜
大藏經慰之

秋七月河東遣使召定疆至沒藏訛龐不聽

河東管勾軍馬司賈達微巡見訛龐所侵田過界
督責麟州守王亮亮懼以聞仁宗詔邊吏約束之
頗加驅掠知并州龐籍曰河西稱臣奉貢未失臣
禮今不先以文告而遽行驅掠使歸曲而責直非

中國體乃遣使以義理約還訛龐不可籍又使人亟召更定疆場亦偃蹇不奉命

八月契丹使來告哀

興宗崩遣告哀使王觀至國尋賜遺物

冬十月起承天寺

沒藏氏好佛因中國賜大藏經役兵民數萬相與慶府西偏起大寺貯經其中賜額承天延回鶻僧登座演經沒藏氏與諒祚時臨聽焉

十一月使如契丹會葬

契丹葬興宗于慶陵夏與中國高麗使並會

嘉祐元年

契丹道宗
清寧二年

夏福聖承道四年春三月河東

禁銀星和市

訛龐不肯定屈野河界恐漢兵先據其境輒屯兵河西以誘官軍龐籍戒官吏曰夏人仰吾和市如嬰兒之望乳若絕之彼必自來母得過河與戰乃懸榜于邊禁絕銀星和市于是國中財用漸乏秋七月移牒索蕃官蘭瓊

宥州移文保安軍乞抽還修古渭砦軍卒并索叛

蕃蘭瓊仁宗詔以蘭瓊世爲蕃官不得擅索令保
安軍報之

九月遣李守貴巡視屈野河

屈野河侵擾日甚仁宗命殿直張安世賈恩爲同
巡檢經制之訛龐專爲調言迫之則格鬪緩之則
就耕終無歸意安世等與龐籍移牒宥州詰責沒
藏氏見牒遣幸臣李守貴至屈野河勘之還白所
耕皆漢地沒藏氏責訛龐令還所侵田會守貴亂
作不果

有星出東井

如太白赤黃色向北速行沒

冬十月盜殺太后沒藏氏

沒藏氏妖冶好佚游騎從甚衆每出卜夜令國中
張燈火以賚娛覽李守貴嘗爲遇乞掌出納寶保
吃多已嘗侍囊霄及沒藏氏于戒壇院皆出入無
間沒藏氏先私于守貴復與吃多已通守貴忿一
日沒藏氏偕吃多已獵于賀蘭山夜歸中道有蕃
騎數十猝戕之并殺吃多已時諒祚生十歲矣訖

龐族滅守貴家

仁宗實錄是年十月丁卯環慶經畧司言夏國小大王阿叔嵬迷裂

坂與沒藏訛龐殺其國母及補細

相公而訛龐挈小羣云所稱

李彥云所稱

大王卽諒祚也補細相公卽吃多已也嵬迷裂坂或

是李守貴也然與正史不同當從正史今參王氏東都事

署錄之遣祖儒嵬名聿則慶唐徐舜卿入告哀

仁宗輶朝一日以集賢校理馮浩假尙書刑部郎

中直史館爲弔慰使文思副使張惟清假文思使

副之

龔鼎臣東原錄作沒藏氏死在嘉祐四年誤

按君母被戕國之大變綱目書弑太后九皆著弑之之人以正其罪未有書盜殺者西夏雖屬

羌戎援列國例沒藏氏亦君母也不書弑而書
盜殺何蓋冶容無異慢藏以君母而淫泆無度
禍直自取耳書盜殺深貶之也

十一月沒藏訛龐納其女爲后

訛龐旣誅李守貴以其女爲諒祚妻自是誅殺由
己臣民咸畏之

按訛龐因沒藏氏久專國政今氏死恐已亦失
柄乃納女爲后故與綱曰魏公操納三女爲貴
人同例書

嘉祐二年契丹清寧三年夏譚都元年春三月以國母遺物入獻

馬駕各百匹

夏五月沒藏訛龐誘麟府將郭恩等戰于忽里堆大敗之

夏衆春耕秋獲旣退之後麟州自州城以西至大橫水浪爽平數十里間絕無一人一騎知麟州武戡嘗于河西置一小堡以備斥堠龐籍遂令戡等于州西二十里左右更築二堡爲護議未定夏兵

已集初訛麗怒邊吏驅掠其民潛聚兵萬餘于境
上待漢兵至擊之邊吏守籍約束夏兵輒以飢疾
散自沒藏氏死訛麗益恣是時屯兵屈野河迨三
月增至數萬人盡發麟州以北民耕牛農具計欲
盡耕河西地而國中有異議者復召還衆皆空壁
去然銀州以南侵耕自若也武戲與通判夏倚謀
乘此作堡砦借管勾軍事郭恩以巡邊名往按之
諜者言夏兵盛屯沙鼠浪郭恩欲止走馬承受內
侍黃道元不可率步騎一千四百餘人不甲者半

夜循屈野河北行至臥牛峯夏兵舉烽起鼓黃道元猶不信比明至忽里堆見蕃騎數十皆西走相去數十步止郭恩等呼之不應亦不動俄而火起訛龐遣衆張左右翼自南北交至堆東有塹其中有梁名斷道堰兩軍接戰自旦至食時伏兵突從旁塹中攀援上四面合擊敗之執郭恩黃道元及兵馬監押劉慶等恩自殺武戡走免

司馬光文集自河東絕市

易夏大窮移書于邊請遣使更議疆場使者至有日隣府將郭恩勇而狂與武戡黃道元率兵不滿千人夜開城門徑往屈野河西前無偵候後無策應中無部伍但賣酒食不爲戰備以至于敗與宋

史夏國傳異

按

綱目書誘戰四書敗歿三罪敗者也此書誘

敗則不罪敗者而罪誘之者蓋訛麗既肆東侵

復設伏以殺恩等雖道元疎愚實謀之者狡也

六月遣使謝弔祭

使人入見仁宗責以忽里堆之役使者惶恐謝仍

厚禮賜歸

秋七月縱黃道元還

軍士馘耳鼻隨還者百人

九月河東遣使再議疆事沒藏訛龐復不聽

河東經畧使遣殿中丞孫兆職方員外郎李思道相繼至國中議疆事約遵慶歷舊例以橫陽河爲麟府界然後畫所侵地三分許一分與夏國不從則拒絕進奉禁止私市訛龐驚不聽

冬十一月河東禁絕私市

宋制官給商人公據方聽與夏國交易私市者法無赦後官吏疎慢法禁日弛夏人與邊民竊相貿易日夕公行故雖無歲遺之物互市之利猶可枝

梧訛龐不肯立屈野河界經畧使以聞仁宗下詔
西人如驅牛馬于沿邊私糴民穀令所在禁絕之
時有夏人與熟戶犯禁龐籍獲之卽斬于犯所于
是兩界凜然

冬十二月遣兵襲鄜延

訛龐自忽里堆之勝恐中國聲討日事點集遣衆
萬餘犯鄜延境時提點刑獄陳安石攝帥事預飭
邊民戒嚴兵至無所獲而還

西夏書事卷十九終